

# Liñas de acción da CTNL

## para o período interasemblemario 2018-2019

(aprobadas na Asemblea Xeral Ordinaria do 3 de marzo de 2018)

### Accións para o cumprimento dos fins da asociación

---

#### 1 Defender os intereses xerais das/dos traballadoras/es de normalización lingüística e da dignidade das condicións de traballo dos servizos lingüísticos:

- Realización de propostas que busquen **mellorar a situación do traballo en normalización lingüística**, nomeadamente na procura da estabilización dos servizos de normalización lingüística e demais departamentos técnicos existentes, e proposta de creación, mellora e seguimento de axudas para o mantemento e creación de servizos de normalización lingüística nas administracións locais.
- **Apoio á estabilización dos postos de traballo para unha formación en lingua galega de calidade**, coa proposta de creación dun corpo estable de profesorado que planifique, prepare e desenvolva materiais e formación lingüística para diversos ámbitos, sectores e perfís, e tendo en conta o recoñecemento deste persoal como persoal laboral indefinido da Xunta tras o xuízos que tiveron lugar nos últimos anos.
- Continuidade da **visibilización do traballo que se desenvolve a prol do galego**, procurando así que o traballo a favor da lingua se vexa socialmente como útil e necesario. Para isto fortalecerase a difusión e información a través do web, redes sociais, vídeos, etc., para visibilizar o traballo de SNL, ENDL, asociacións, empresas, etc., publicando novas, reportaxes, entrevistas, etc. Tentarase difundir especialmente o **labor de planificación lingüística** co fin de que se coñezan mellor as diferentes etapas do traballo técnico de normalización da lingua e se recoñeza a complexidade e a necesidade deste traballo.
- Finalización do **manual de boas prácticas para a convocatoria de prazas de técnico/a de normalización lingüística**, co fin de ofrecer, por unha parte, ás institucións unha guía para as súas convocatorias, e, por outra, ás/aos candidatas/os un manual que resolva as dúbidas máis habituais sobre as convocatorias: prazos, contidos das bases, requisitos, reclamacións, etc.
- Como complemento e continuación do manual anterior, elaboración dunha **proposta de temario específico para prazas de técnico/a de normalización lingüística e de modelos de probas, especialmente das probas prácticas**,

adaptado todo á realidade do traballo de normalización da lingua. Buscarase despois que recoñezan e asuman a proposta institucións que teñen capacidade para influír nas entidades que convocan as prazas.

Con esta proposta búscase máis unificación nos procesos selectivos, evitar convocatorias pouco adaptadas á realidade do traballo de normalización da lingua e facilitar tanto a preparación das probas por parte dos/das candidatos/as coma o traballo dos membros dos tribunais de selección.

## 2 Promover a formación continua no eido da normalización da lingua:

### ORGANIZACIÓN DE ACCIÓNS FORMATIVAS PARA O TRABALLO EN NORMALIZACIÓN LINGÜÍSTICA

Cada ano a CTNL organiza directamente algunha actividade formativa sobre diferentes materias na procura de mellorar os coñecementos e capacidades das persoas que traballan en normalización lingüística en diferentes ámbitos. Na maioría destas accións formativas conta coa colaboración do Departamento de Filoloxía Galega da Universidade de Santiago de Compostela e co apoio económico da Secretaría Xeral de Política Lingüística.

Debido a unha serie de factores, como poden ser a falta de expectativas laborais, a cada vez maior formación do persoal técnico que está traballando e a non incorporación de novo persoal e tamén as maiores dificultades detectadas para asistir a formación en horario laboral, cómpre reformular algunhas cuestións sobre o modelo de formación e facer esta dun xeito máis indirecto a través de materiais de diferente tipo ou de xornadas de formatos diversos, e non tanto a través de cursos nos formatos convencionais.

Deste xeito, en 2018 desenvolverase algún curso ou obradoiro con algún dos seguintes contidos:

<b>Deseño e avaliación de probas de lingua nas administracións públicas</b>	
<b>Obxectivos</b>	<ul style="list-style-type: none"><li>• Aprender a deseñar probas de lingua adaptadas ás necesidades de competencia lingüística dos diferentes perfís profesionais das administracións</li><li>• Aprender a axustar os certificados Celga aos postos de traballo das administracións públicas</li><li>• Aprender e desenvolver criterios de avaliación eficaces para as probas de lingua nos procesos selectivos</li></ul>
<b>Destinatarios/as</b>	<ul style="list-style-type: none"><li>• Traballadores/as de servizos de normalización lingüística (SNL) das administracións públicas</li></ul>

<b>Duración</b>	Aproximadamente 20 horas
<b>Profesorado</b>	Persoa con coñecemento na materia e capacidade de adaptación ás nosas necesidades concretas

<b>Método Lombard aplicado a actividades de normalización da lingua</b>	
<b>Obxectivos</b>	<ul style="list-style-type: none"> <li>• Formación avanzada en materia de creatividade, innovación e emprendemento</li> <li>• Aprender a desenvolver dinámicas que incrementen a motivación e a capacidade de mobilización do equipo</li> <li>• Ser quen de implementar en grupos accións que consigan activar a creatividade das persoas co fin de aplicala para a xeración de proxectos que favorezan o uso da lingua e incrementen o seu prestixio</li> </ul>
<b>Destinatarios/as</b>	<ul style="list-style-type: none"> <li>• Traballadores/as de servizos de normalización lingüística (SNL).</li> <li>• Traballadores/as de empresas, asociacións e outras entidades relacionadas coa normalización da lingua.</li> <li>• Membros de equipos de normalización e dinamización lingüística do ensino.</li> <li>• Persoas interesadas en traballar pola normalización da lingua.</li> </ul>
<b>Duración</b>	Aproximadamente 16-20 horas
<b>Profesorado</b>	Persoas con coñecemento na materia e capacidade de adaptación ás nosas necesidades

<b>Obradoiro de comunicación para a normalización lingüística (redes sociais, notas de prensa)</b>	
<b>Obxectivos</b>	<ul style="list-style-type: none"> <li>• Coñecer e analizar diferentes formatos e medios para comunicar as accións de normalización lingüística</li> <li>• Planificar axeitadamente a comunicación para accións de normalización lingüística.</li> <li>• Coñecer os formatos e aprender a redactar notas de prensa que comuniquen axeitadamente a mensaxe e información que se quere transmitir desde SNL, ENDL, asociacións en defensa da lingua, etc.</li> <li>• Coñecer como, cando, a onde e a quen se deben enviar as notas de prensa sobre lingua na procura de que teñan a repercusión axeitada no ámbito de interese.</li> <li>• Aprender a atopar titulares e frases que fagan que a</li> </ul>



	<p>comunicación chegue de forma máis eficaz</p> <ul style="list-style-type: none"><li>• Coñecer as mellores técnicas de comunicación en redes sociais (estratexias, formatos que mellor comunican, etc.) para optimizar a presenza nas redes sociais dos SNL, ENDL e outras entidades que traballan en lingua</li><li>• Conseguir que o traballo en lingua e as accións a prol do galego teñan maior e mellor repercusión social a través dos medios.</li></ul>
<b>Destinatarios/as</b>	<ul style="list-style-type: none"><li>• Traballadores/as de servizos de normalización lingüística (SNL).</li><li>• Traballadores/as de empresas, asociacións e outras entidades relacionadas coa normalización da lingua.</li><li>• Membros de equipos de normalización e dinamización lingüística do ensino.</li><li>• Persoas interesadas en traballar pola normalización da lingua.</li></ul>
<b>Duración</b>	Aproximadamente 8 horas presenciais e 4 horas non presenciais de traballo con titorización
<b>Profesorado</b>	Xornalista con coñecementos e experiencia, nomeadamente no ámbito da lingua

- Colaboración con outras propostas formativas:
  - Colaboración coa Secretaría Xeral de Política Lingüística nunha **xornada técnica sobre a normalización lingüística dirixida á mocidade**.
  - Posibilidade de colaboración coa Galipedia nalgunha actividade formativa ou divulgativa de interese para técnicos/as de normalización lingüística ou docentes.

## DOCUMENTOS FORMATIVOS E INFORMATIVOS

- Publicación do **manual de boas prácticas para a convocatoria de prazas de técnicos/as de normalización lingüística**.
- Procura de continuidade da colección de materiais **Documentos CTNL**, na que se inclúen materiais formativos e de referencia.
- Publicación e difusión a través da rede de materiais formativos de cursos da CTNL.

### 3 Propostas para facer máis efectivo o traballo a prol da normalización da lingua e colaboración en accións para o fomento do galego:

#### ACCÍONS PARA UNHA MELLOR E MAIOR IMPLICACIÓN DAS ADMINISTRACIÓNS PÚBLICAS NO PROCESO DE NORMALIZACIÓN LINGÜÍSTICA

- **XUNTA DE GALICIA:** seguimento da política lingüística da Xunta de Galicia, procurando que esta volva ao camiño do diálogo e do consenso que abandonou, demandando que procure avances en vez de retrocesos, denunciando os continuos pasos atrás que se dan e os pasos adiante que se deixan de dar e propondo melloras no desenvolvemento de proxectos e accións para o fomento do uso e prestixio da lingua galega.
- **ADMINISTRACIÓN LOCAL:** seguimento das convocatorias de axudas das deputacións provinciais para a creación de SNL e tamén das convocatorias de prazas en concellos e entidades locais ao abeiro ou non destas axudas.
- **RECENRALIZACIÓN DE SERVIZOS (Base de Datos Nacional de Subvencións e Taboleiro Edictal Único):** información aos responsables políticos da negativa repercusión da centralización de servizos nos avances en normalización lingüística nas administracións locais e na Administración autonómica. Procura da implicación dos responsables políticos na busca dunha solución e reversión dos retrocesos detectados.

#### ENCONTROS, XORNADAS E OUTRAS PROPOSTAS DE COORDINACIÓN

LGx15	
<b>Descrición xeral</b>	Organización dunha xornada de exposición de ideas que teñan que ver co futuro da lingua, na que interveñan persoas que transmitan, dun xeito breve e visual, ideas que poden, e queren, influír no futuro do uso e prestixio do galego e/ou nas actitudes e comportamentos lingüísticos de persoas ou entidades, procurando accións e cambios. Esas intervencións, ideas e propostas serán tamén gravadas e difundidas en vídeo a través da rede, nun formato semellante ao das conferencias TED.
<b>Obxectivos</b>	<ul style="list-style-type: none"> <li>• Recoller e difundir ideas coas cales se pode mellorar o futuro do uso e prestixio da lingua.</li> <li>• Realizar e difundir vídeos breves para a transmisión desas ideas.</li> <li>• Procurar influír no futuro do uso e prestixio do galego e/ou nas actitudes e comportamentos lingüísticos de persoas ou entidades, procurando accións e cambios, a través da</li> </ul>

	transmisión de ideas e mensaxes de persoas.
<b>Destinatarios/as</b>	<ul style="list-style-type: none"> <li>• Persoas interesadas no futuro da lingua (na sesión presencial) e, ademais, tamén público máis xeral (coa difusión dos vídeos).</li> </ul>
<b>Duración</b>	Unha tarde ou tarde-noite (arredor de 3 ou 4 horas).
<b>Formato</b>	Intervencións individuais cun tempo máximo (15 min.), claras e visuais, sen preguntas, e sen uso de mesa nin atril.
<b>Lugar</b>	Nun auditorio por determinar.
<b>Persoas que interveñen</b>	Persoas que teñan algo que dicir, ideas que valla a pena compartir e transmitir para influír no futuro da lingua, e que teñan capacidade para comunicar de xeito claro, positivo, apaixonado, visual e breve, coa vontade de intentar mudar cousas. A busca ou selección de persoas e propostas faraa a CTNL.
<b>Notas sobre a xestión</b>	Desde a CTNL nomearase unha comisión encargada da organización, selección de persoas, xestión, etc. Non se pagará polas intervencións. Cobrarase unha entrada para asistir ao evento que axude parcialmente a financiar, en parte, o equipo técnico necesario, as gravacións, a difusión, etc.

- **ENCONTRO DE ANÁLISE SOBRE A FORMACIÓN DE ADULTOS EN GALEGO:** logo da xornada desenvolvida no 2012, da cal saíu unha [Proposta para a mellora da programación e xestión dos Celga](#), valorárase a pertinencia de analizarmos a necesidade da formación de adultos no proceso de normalización da lingua a través dunha xornada de participación de diversos colectivos: profesorado, técnicos/as de normalización lingüística, institucións...
- **ENCUNTROS PARA A NORMALIZACIÓN LINGÜÍSTICA:** colaboración cos XX Encuentros para a normalización lingüística, organizados desde o CDSG do Consello da Cultura Galega (en abril de 2018).

## ACCIÓNS DE FOMENTO DO GALEGO

- **Continuidade e difusión de Agasallo.eu, propostas de regalos en galego**

A finais de 2013 púxose en marcha a plataforma dixital Agasallo.eu ([www.agasallo.eu](http://www.agasallo.eu)), para compilar e difundir propostas de regalos en galego de todo tipo, para todos os gustos e idades, etc., para dar a coñecer e visibilizar creacións de



diverso tipo que usan a lingua galega e para incentivar que a xente teña en conta a lingua á hora de facer agasallos.

A plataforma tivo moi boa acollida inicial e, aínda que custou a implicación de empresas e entidades para participaren nela, pouco a pouco foi medrando o número de participantes e a cantidade e variedade de propostas que contén. Na actualidade a plataforma contén arredor de 400 propostas que se van actualizando.

Continuarase coa campaña, mantendo actualizado o web e difundindo a través das redes sociais os novos produtos que se vaian publicando.

- **Premio a accións, programas, proxectos, etc., de normalización lingüística**

Instauración dun premio a accións, programas, proxectos, etc., que se desenvolvan desde SNL, ENDL, asociacións, entidades, empresas, etc., e que teñan como obxectivo a normalización lingüística.

Este premio procuraría ser un recoñecemento ao traballo ben feito, dar unha imaxe positiva, supor un aval para as accións que se valoren, marcar modelos de accións e difundir o traballo que se realiza a prol da lingua galega.

Nestes momentos hai diferentes premios que valoran o uso da lingua galega, os efectos que ese uso ten ou traxectorias, en determinados ámbitos (Leixaprén, Manuel Beiras, Xoán Manuel Pintos, Lois Peña Novo, etc.), mais non hai ningún premio que recoñeza accións desenvolvidas que teñen como obxectivo principal a normalización da lingua galega. Por iso se considera de interese a instauración deste premio, co que se pretende recoñecer accións, programas, produtos ou proxectos, mais en principio non entidades, persoas ou traxectorias.

- **Gústame o galego!: aproveitamento das redes sociais**

O Facebook da campaña *Gústame o galego!* ten máis de 15 000 seguidores e o Twitter máis de 6000. Cómpre estudar como aproveitar este amplo número de seguidores/as en algunha acción concreta.

## **Algunhas propostas organizativas para 2018-2019**

---

- Mantemento da cota dos/as socios/as como nos últimos anos, sen ningún incremento (a cota convencional é de 25 € ao ano e a de desempregados/as e estudantes de 15 € ao ano).
- Posta en marcha de grupos de traballo para o desenvolvemento dos diversos proxectos programados



- Procura de renovación de convenios e novos acordos de colaboración con outras entidades para o desenvolvemento dalgunhas das accións que está previsto desenvolver.
- Nas comisións e plataformas das que a CTNL forma parte seguiranse facendo propostas en positivo e procurando que sexan o máis plurais e representativas posible, e que a través delas se lles dea voz, participación e protagonismo a persoas e entidades varias e de distinto ámbito e perfil a prol da normalización lingüística (dentro do perfil e ámbito de cada unha das comisións e/ou plataformas). Nestes momentos a CTNL forma parte de:
  - Comisións Técnica do Centro de Documentación Sociolingüística de Galicia (CDSG).
  - Comisión Cidadá de Normalización Lingüística do Concello de Vigo.
  - Plataforma Queremos Galego.